

Orguyoso cu fundacionnan ta siguiendo su maneho

Minister dr. Richard Visser di bishita na aliansa nobo

Fundacion cu ta yudando 8 adicto den rehabilitacion

DEN cuadro di su maneho pa guia adictonan di droga den un miho rumbo, Minister dr. Richard Visser recientemente a bishita Fundacion Aliansa Nobo na Mahuma. Ta trata aki di un centro nobo specialisa pa yuda y sostene adictonan den e proceso dificil di rehabilitacion. E mandatario a keda masha satisfecho cu e profesionalismo di e fundacion y e compromiso serio cu nan tin pa guia adictonan den rehabilitacion. Actualmente e centro ta guiando activamente 8 adicto pa por rehabilita di droga.

Atende cu adictonan y fiha un maneho cu ta soluciona e fenom-

eno di adictonan ambulante den centro di ciudad ta un tuma cu pa hopi aña no tabata popular, te ora cu Dr. Richard Visser a asumi e funcion di Minister di Salubridad Publico y Deporte. Mesora a lora manga di camisa y personalmente el a cuminsa bishita y convence e adictonan cu tin un miho bida sperando riba nan ora nan laga adiccion na droga atras.

Durante e bishita na Fundacion Aliansa Nobo, Minister Dr. Richard Visser a topa cu Robert Candelaria y Jose Sophia, ambos miembro di e directiva diario di e fundacion. Durante e bishita, e

fundacion a haya un bon oportunidad pa splica e mandatario di nan fundacion, nan trabounan existente y di nan ideanan pa futuro. Ta obvio cu e fundacion ta tuma e trabou di yuda guia adictonan den rehabilitacion masha na serio y cu intencion di sigui amplia nan servicicionan den futuro.

Minister Dr. Richard Visser a bisa durante su bishita cu e ta encurashar e fundacion pa sigui duna un man den e lucha pa hunto nos yuda e adictonan. Gobierno ta realisa cu e trabou ta asina grandi cu su so no por haci'e. Ta p'esey Gobierno ta aprecia masha e

sosten grandi cu ta ricibiendo di un lista largo di fundacionnan, instancianan y hasta di boluntarianan individual den e proceso pa guia adictonan for di droga.

Den e cuadro aki mes, Gobierno a bini cu e idea pa lanta un organisacion, Consejo Nacional di Droga, cu ta atende cu tur e fundacionnan den e ramo di drogadiccion. Tanto esunnan cu ta traha den prevencion, esunnan cu ta den rehabilitacion y tambe esunnan cu ta yuda e adictonan integra bek den comunidad despues di rehabilitacion. Minister Dr. Richard Visser ta convenci cu ta asina so nos por logra mas,

dor di traha hunto entre sector publico y sector priva. Ya caba e organisacion y e fundacionnan a cuminsa mira adelanto caba.

Fundacion Aliansa Nobo tambe ta un di esunnan cu ta forma parti na Consejo Nacional di Droga.

Minister Dr. Richard tabata compaña pa Jan van der Straten, consehero pa asuntunan di droga na Ministerio di Salubridad Publico, tambe John Merryweather y Jaap Beaujon, kendenan ta respectivamente e Presidente y Vice Presidente di Consejo Nacional di Droga.

